



Kommuneqarfik Sermersooq

**Meeqqanut ineqarnermullu tapiissutit pillugit inatsisit aqunneqarnerannut tunngatillugu nakkutilliinermi nalunaarusiaq**

30-05-2020  
Suliap normua. 2020 - 1863  
All. id. 13905813

Aallaqqaasiut

2020-mi sapaatit akunnerini 7-9-ni Isumaginninnermut Inatsisinillu Atuutsitsinnermut Naalakkersuisoqarfiup Kommuneqarfik Sermersuumi isumaginninnermut tunngasuni inatsisitigut suliassaqaarfiit marluk nakkutilliiffigai.

Postboks 260  
3900 Nuuk  
Oqarasuaat (+299) 34 50 00  
Fax +299 34 66 66  
E-mail: iian@nanoq.gl  
www.naalakkersuisut.gl

Immikkut siunnersortit Jeffrey Vries Andersen, Caroline Volther aamma Marcus Morsel Carlsen nakkutilliipput.

Nakkutilliisut pisortatigoortumik ingerlatsineq, meeqqanut ineqarnermullu tapiissutinik naatsorsuineq ukkataraat - ingammillu kommunip meeqqanut ineqarnermullu inatsisit januaari 2018-imi atuutilersimasut eqqortissimanerai isiginiarsimallugit.

Isumaginninnermi suliassaqaarfimmi nakkutilliisarneq pillugu Namminersorlutik Oqartussat nalunaarutaat nr. 1, 16. januaari 2020-imeersoq, 17. januaari 2020-mi atuutilersoq, tunngavigineqarluni nakkutilliisoqarpoq.

Nakkutilliisut Nuummi inunnik isumaginnittoqarfik pulaarsimavaat. Nakkutilliisut isumaginnittoqarfimmi pisortanik sulisunillu sivikitsumik apersuipput. Tamatumalu saniatigut meeqqanut tapiissutit pillugit suliat qulingiluat aammalu ineqarnermut tapiissutit pillugit suliat qulit nakkutilliisunit misissorneqarput.

**Meeqqanut tapiissutit**

Meeqqanut tapiissutit pillugit Inatsisartut inatsisaat nr. 9, 7. december 2009-imeersoq aamma Meeqqanut tapiissutit pillugit Inatsisartut inatsisaata allanngortinnera pillugu Inatsisartut inatsisaat nr. 7, 27. november 2018-imeersoq aammalu nalunaarutit tassunga attuumasut aallaavigalugit kommunip ingerlatsineranik nakkutilliisoqarpoq. Nakkutilliisut tulluuttunik oqaaseqaatissaqarput:

*Kommune naatsorsueriaatsimut nutaamut ikaarsaarluarsimavoq*

2018-imut Aningaasanut inatsit atuutilernerani meeqqanut tapiissutinut naatsorsueriaaseq allanngortinneqarpoq. Suliani toqqakkani nakkutilliisut naatsorsueriaasitoqaq atorneqarsimanissaannut takussutissanik nassaanngillat. Nakkutilliisut inerniliipput 2018-imut Aningaasanut inatsit naapertorlugu naatsorsueriaatsit nutaat kommuninit atulernerqarsimasut.

*Akigitat nutartikkat kommunimit atorneqarput*

Meeqqanut tapit angissusiat milliartortinnerannullu killingi ukiumoortumik aaqqiiffigineqartarput isumaginninnikkullu aningaasat tunniunneqartartut atuuttut pillugit kaajallaasitami ukiumoortumik 1. januaarimi imaluunniit pisariaqaraangat saqqummersinneqartartumi takuneqarsinnaapput - Isumaginninnikkut aningaasat tunniunneqartartut atuuttut pillugit kaajallaasitaq nr. 291 kingullertut saqqummersinneqarpoq. Kommuni akigititaasut nutaat meeqqanut tapiissutinik naatsorsuinnermini atortarai nakkutilliisut takusinnaavaat.

*Kommunip aalajangiinnermut allakkat atorneq ajorpai*

Meeqqanut tapiissutinik tunniussisarneq naatsorsueqqittarnerlu ingerlatsinermi aalajangiineruvoq. Taamaammat kommune innuttaasumut meeqqanut tapiissutinik tunniussigaangat imaluunniit naatsorsueqqikkaangat pinerit tamaasa aalajangiinnermut allakkamik nassiussisassaaq. Meeqqanut tapiissutit pillugit Namminersorlutik Oqartussat nalunaarutaanni nr. 10, 14. december 2018-imeersumi § 3-mi aalajangiinnermut atatillugu paasissutissat suut tunniunneqartassanersut pillugit maleruagassat nassuiarneqarput. Sulianik misissuinerup takutippaa kommunip aalajangiinnermut allakkat atorneq ajorai. Tamanna isornartoqartinneqarpoq kingunerisaanillu innuttaasut kommunimut sianertariaqartarput apeqqutiginiarlugu soq tapiissutitik allanngortinneqarsimanersut, tamannalu ingerlatsinermi ileqqorissaarnermut naapertuutinngilaq. Sulianik misissuinerup takutippaa kommune ilaatigut kukkusumik meeqqanut tapiissutinik tunniussisartoq, taamaattoqaraangallu innuttaasoq ingerlatiinnaq kukkuneq pillugu kommunimut nalunaarsinnaatitaassaaq imaluunniit Isumaginninnermi Naammagittaalliuteqartarfimmut naammagittaalliuteqarsinnaatitaassalluni. Nakkutilliisut inassutigaat meeqqanut tapiissutit pillugit ingerlatsinermi aalajangiinerit tamarmik siunissami allakkatigut suliarineqassasut, nassiunneqassasut nalunaarsuiffinnullu ikkunneqassallutik.

*Uppernarsaatit sumiiffinni assigiinngitsuniipput*

Isertitassatut naatsorsuutigineqartut assakkut allallugit allanngortinneqaraangata kommunip isertitassatut naatsorsuutigineqartut nalilersornerannut uppernarsaatissat nalunaarsuiffinnut ikkuttassavaat. Kommuni qitiusumik Winformatik aamma SBSYS nalunaarsuiffittut atortarpai. Suliami ataatsimi innuttaasup isertitassatut naatsorsuutigisai allanngortinneqarsimapput, kisianni SBSYS-imi uppernarsaatissat nassaassaangillat. Kommuni uppernarsaatit allagaatinut toqqorsivimmi piginerarpari, kisianni nakkutilliinnermut atatillugu uppernarsaatit ujartorneqarsimagaluarlutik nassaarineqangillat. Suliami allami kingumoortumik tunniussisoqarsimanerannut uppernarsaatit aamma SBSYS-imi nassaassaangillat. Kommuni digitalimik nalunaarsuiffeqarnera nakkutilliisunit iluarineqarpoq, kisianni erseqqissaatigineqassaaq allakkat attuumassuteqartut tamarmik toqqorneqartassasut.

*Aaqqissuussap immikkoortiterisarnera isumalluutigineqarpallaarpoq*

Qaammatikkuutaartumik meeqqanut tapiissutit kommunimi tapiiffigineqartartunut tamanut tunniunneqartarput/naatsorsorneqartarput/naatsorsoqqinneqartarput. Aaqqissuussap Winformatikip tunniunneqartussat marlunngorlugit immikkoortittarpari; "EJ" aamma "JA"-nngorlugit. Suliat "EJ"-itut immikkoortinneqartut sullissisunit suliarineqartarput. Suliat "JA"-tut immikkoortinneqartut sullissisunit suliarineqaratik toqqaanaq tunniussassanngortarput. Tamanna isumaqarpoq aaqqissuussaq kukkusumik tunniussippat kingornalu suliaq "JA"-nngorlugi immikkoortippagu taava

kukkusoqarsimanera paasineqarnaviangilaq. Aalajangiinermut allakkatigit paasissutissiisoqarneq ajormat kukkusoqarsimanera pillugu innuttaasoq paasitineqarnaviangilaq. Kukkuosqarsimanera paasissallugu innuttaasumut sullissisumullu ajornakusuungaatsiassaaq. Tamanna inatsisitigit isumannaatsuunissamut tunngatillugu ajornartorsiutaavoq. Sulianik misissuinerup aamma takutippaa aaqqissuussap "EJ"-imut "JA"-imullu immikkoortiterisarnerani kukkusimasoqartarsinnaasoq. Suut tunngavigalugit aaqqissuussap sulianik "EJ" imaluunniit "JA"-nngorlugit immikkoortiterisarnera pillugu kommune pitsaakannersumik ilisimasaqarpoq. Kommunip sullissinera taamak annertutigisumik qarasaasiakkut aaqqissussamit isumagineqartillugu kommunip aaqqissuussap suleriaasii ilisimalluaqqissaartariaqarpai. Kommunip sukumiinerusumik ilisimasaqarusuppat suliaq "EJ" imaluunniit "JA"-nngorlugit immikkoortinneqartarnerannut pissutaasartut tamaasa KimikIT-mit nassuiarneqarnissaat piumasarisinnaavai. Tamatuma saniatigit kommunip suliat "JA"-jusunit misissugassanik tigusillattaarluni misissuinikkut kukkunerit naammattoorniarsinnaavai. Taamaaliornikkut aaqqissuussap immikkoortiterisarnera annertuallaamik isumalluutigiunnaarneqassaaq.

Nakkutilliisut aaqqissuussap kukkusumik meeqqanut tapiissutissanik naatsorsuisarsimaneranut takussutissaqartinnngilaat. Imaasinnaavorli meeqqanut tapiissutissanik naatsorsuinermi kikkut isertitaat ilanngunnissaat pillugit aaqqissuussaq kukkusumik toqqaasartooq. Kukkunerit taamaattut pilersaraangamik aaqqissuussarli pinerit tamaasa nammineq kukkunertut nalunaarneq ajorpagit, suliani arlalinni allani nakkutilliinermi misissorneqarsimanngitsuni assingusumik kukkuneqarsinnaasoq, nakkutilliisunit nalilerneqarpoq.

*Meeqqanut tapiissutit ullormi naatsorsuutininik allattuiffiusumi kingorna ataataassutsimut tunngasumi aalajangiisoqarneranut atatillugu suliami kukkuneq*

Suliami pineqartumi ataataassuseq 2018-imi akuerineqarpoq. Qaammatip tulliani ataataasup isertitai meeqqanut tapiissutit naatsorsorneqarnerani ilaatinneqartussaasimapput. Qaammatimi pineqartumi ataataassuseq akuerineqarmat, meeqqanut tapiissutit naatsorsuutininut allattorneqarlutillu tunniunneqarlutik, ataataasup isertitai naatsorsuinermit tunngavigineqartumut ilanngunneqarsimanngillat. Taamaammat qaammatimi tulliuuttumi meeqqanut tapiissutit qaffasippallaarput. Kommunip kukkusoqarsimasooq paasisussaasimagaluarppaa qaammatillu tulliani kingumoortumik iluarsiiisuteqarsimalluni. Suliaq "JA"-tut immikkoortinneqarsimammat kukkusoqarsimanera pillugu kommune paasisaqanngilaq, kingumoortumillu iluarsiiisuteqarsimanani. Nakkutilliisut isumaat malillugu kommune kingumoortumik iluarsiiisuteqassanngilaq, makku pissutigalugit:

- Aningaasat pineqartut annertunngillat
- Kingumoortumik iluarsiiisuteqartoqassappat innuttaasoq artukkerneqassaaq
- Innuttaasoq eqqunngitsunik paasissutissiisimanngilaq
- Kukkuneq ukioq 1½ matuma siorna pisimavoq.

Nakkutilliisut inassutigaat kommunip siunissami suliassani kingumoortumik iluarsiiisuteqartariaqarsinnaanera arajutsinaveersaassagaa, assersuutigalugu ullormi naatsorsuutininik allattuiffiusumi kingorna ataataassutsimut tunngasumi aalajangiisoqarpat.

*Suliani isertitarineqartut qallerlugit assakkut allanneqaraangata kommune eqqumassaaq*

Isertitarineqartut qallerlugit assakkut isertitassatut naatsorsuutigineqartut allanneqaraangamik ukiup sinneranut atuuttussanngortarput. Nakkutilliisut inassutigaaat kommunip innuttaasup isertitai piffissap ingerlanerani nikerarnersut eqqumaffigilluinnassagai, malitsigisaannik isertitassatut naatsorsuutigineqartut naatsorsoqqinneqartariaqarsinnaagamik. Nakkutilliisut paasisaat naapertorlugit kommunip innuttaasut isertitaat allannngortarnersut nakkutigineq ajorpai. Assersuutigiinnarlugu innuttaasup ilinniarnermik aallartitaqarnerminut atatillugu isertitai ikilingaatsiarsinnaapput, tamannalu pissutigalugu isertitassatut naatsorsuutigineqartut assakkut allallugit allannngortinneqarsinnaapput. Innuttaasooq pineqartoq saniatigut sulisaleruni malitsigisaanilu isertitaqarnerulerluni, suleriaaseq maanna atorneqartoq pissutigalugu kommunip tamanna arajutsissavaa. Innuttaasup meeqqanut tapiissutisiai aatsaat ukiup naanerani naatsorsoqqinneqassapput. Tamanna innuttaasut ukiup naanissaata tungaanut kukkusumik meeqqanut tapisiaqarsinnaanerannik kinguneqarsinnaavoq.

*Isertitarineqartut qaammammi ataatsimi takuneqarsinnaanngippata isertitat akileraarutaasussat taarsiullugit atorneqartarput. Tamanna pissusissamisuunngilaq.* Ilaatigut kommunip qaammammut isertitat pillugit paasisutissat Akileraartarnermut Aqutsisoqarfimmit tigungitsoortarpai. Taamaattoqaraangat Winformatikip isertitat pillugit paasisutissat amigartut taarsiullugit toqqaannartumik isertitat akileraarutaasussaasut kingulliit ikkussortarpai. Tamanna pissusissamisuunngilaq isertitat akileraarutaasussaasut isertitarineqartullu nikingangaatsiarpata meeqqanut tapiissutit nikerangaatsiarsinnaammata. Meeqqanut tapiissutit pillugit Inatsisartut inatsisaata allannngortinnera pillugu Inatsisartut inatsisaat nr. 7, 27. november 2018-imeersoq naapertorlugu isertitarineqartut aallaavigalugit meeqqanut tapiissutit naatsorsorneqassapput. Nakkutilliisut naliliipput, taamatut pisoqaraangat Winformatikip isertitat akileraarutaasussaasut kingulliit atornagit isertitarineqartut ilisimaneqartut kingulliit atortarunigit inatsimmut naapertuunnerussasoq. Kommunip aaqqissuussaq Winformatik pigigamiuk aaqqissuussami suleriaatsip allannngortinnissaa akisussaaffigaa.

### **Ineqarnermut tapiissutit**

Nakkutilliisut Inissiani attartortittakkani ineqarnermut tapiissutit pillugit Inatsisartut inatsisaat nr. 23 7. december 2015-imeersoq kingusinnerusukkut allannnguuteqartoq tassungalu atasumik nalunaarutit tunngavigalugit kommunip ingerlatsineranik nakkutilliipput. Nakkutilliisut tulliuttunik oqaaseqaatissaqarput:

*Kommune naatsorsueriaatsimut nutaamut ikaarsaarluarsimavoq* Ineqarnermut tapiissutisinissamut appariartortitsinissamut killiliussat, aningaasanut killiliussat, nammineq akileeqataassutissat kiisalu ineqarnermut tapiissutit aningaasartaasa minnerpaaffissaat annerpaaffissaallu pillugit Namminersorlutik Oqartussat inatsisaat nr. 20, 24. november 2017-imeersoq atuutilermat ineqarnermut tapiissutinik naatsorsueriaaseq nutaaq atulernerqarpoq. Suliani toqqakkani nakkutilliisut naatsorsueriaasitoqaaq atorneqarsimanissaannut takussutissanik nassaanngillat. Nakkutilliisut inerniliipput, nalunaarummi naatsorsuineranut maleruagassat nutaat kommunimit atulernerqarsimasut.

*Akigititat nutartikkat kommunimit atorneqarput*

Ineqarnermut tapiissutisinissamut appariartuaartitsinissamut killiliussat ukiumoortumik aaqqiiffiqineqarlutillu saqqummersinneqartarput - Isumaginninnikkut aningaasat tunniunneqartartut atuuttut pillugit akigitinneqartunut kaajallaasitami nr. 291 kingullertut saqqummersinneqarpoq. Ineqarnermut tapiissutissanik naatsorsuinermini appariartuaartitsinissamut killiliussat nutartikkat kommunimit atorneqartut nakkutilliisut takusinnaavaat.

*Paasissutissat assigiinngitsut attartortitsisumit tiguneqareeraangata aatsaat kommunip ineqarnermut tapiissutit tunniuttarpari.*

Innuttaasup ineqarnermut tapiissutisiaqarnissaminut qinnuteqaraangat attartortitsisup inissiamik attartortitseqqusaaneranut uppenarsaatimik kommune attartortitsisumit pissarsiniartarpoq. Aatsaallu uppenarsaatit tiguneqarpata kommune innuttaasup ineqarnermut tapiissutisiaqarnissaminut qinnuteqaataa pillugu aalajangiissaaq. Attartortitsisoq piffissaq sivisooq atorlugu uppenarsaatinik nassiussigaangat ajornartorsiutit pilersarput. Tamatuma kingunerisaanik innuttaasup ineqarnermut tapiissutissani kingusinaarluni tigusarpari, tamannalu innuttaasumut ajoqutaavoq. Inissiani attartortittakkani ineqarnermut tapiissutit pillugit Inatsisartut inatsisaat nr. 23, 7. december 2015-imeersumi § 1 naapertorlugu ineqarnermut tapiissutit kisimik inissiamik attartornermut inatsisit qaqugumulluunniit atuuttut malillugit ineqartinneqartunut tunniunneqarsinnaapput. Taamaammat attartortitsisup aatsaat inissiamik attartortitseqqusaanini uppenarsareeraangamiuk kommunip ineqarnermut tapiissutinik tunniussisarnera eqqortuliorneruvoq. Qinnuteqaatip nassiunneraniit piumasaaqatillu naammassineqareernerata kingorna qaammatip aallaqqaataaniit kommunip kingumoortumik ineqarnermut tapiissutinik tunniussisarnera eqqortuliorneruvoq. Kommunimit nalunaarutigineqarpoq sulianni ilaanni attartortitsisumit paasissutissat arlallit tiguneqarnissaata tungaanut ineqarnermut tapiissutinik tunniussisoqarnissamut aalajangiineq kinguartinneqartarsimasooq, naak paasissutissat pineqartut aallaaviatigut inissiamik attartuisinnaanermut ineqarnermullu tapiissutisiaqarnissamut kalluaassanngikkaluartut. Tamanna eqqunngilaq. Kommune nalunaarpoq suleriaaseq taanna allanngortissallugu.

*Isertitarineqartut naatsorsorneranni pisortanit ikiorsiissutit allat ilanngunneqassanngillat*  
Inissiani attartortittakkani ineqarnermut tapiissutit pillugit Inatsisartut inatsisaat nr. 23, 7. december 2015-imeersumi § 5 naapertorlugu ineqarnermut tapiissutit isertitarineqartut aallaavigalugit naatsorsorneqartassapput. Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni nr. 9, 1. juni 2017-imeersumi § 5 imm. 3 oqaaseqatigiit aappaat naapertorlugu pisortanit ikiorsiissutit pillugit Inatsisartut peqqussutaat naapertorlugu ikiorsiissutit naatsorsuinermini ilanngunneqassanngillat.

Nakkutilliisoqarnerani paasinarsivoq kommunip isertitarineqartut assakkut allallugit allanngortikkaangamigit pisortanit ikiorsiissutit isertitarineqartunut ilannguttarsimagai. Tamanna inatsisinut atuuttunut naapertuutinnngilaq. Taamaammat kommunip suleriaatsini allanngortittariaqarpaa.

*Nalunaarsuiffinnut allattuisannginneq*

Nakkutilliinerimi paasinarsivoq suliani arlalinni ineqarnermut tapiissutisianik naatsorsueqqinnernut tunngasuni aalajangiinermut allakkat nalunaarsuiffinnut toqqorneqarsimangitsut. Kommunip aalajangiinermut allakkat tamaasa nalunaarsuiffinnut toqqortassavai.

*Qarasaasiakkut pappialakkullu qinnuteqarnermi uppernarsaanissamut piumasaqaatit assigiinngillat*

Sullissivik aqputigalugu innuttaasup ineqarnermut tapiissutisiaqalernissamut qinnuteqaraangami qaammatini kingullerni pingasuni aningaasarsiat allagartaat ilanngullugit tunniutissavai. Tamatuma saniatigut innuttaasut ukiunut marlunnut A11 (ukiumut isertitat pillugit paasissutissat) kakkiullugit ilannguttussaavaat. Innuttaasorli pappialakkut qinnuteqarpat kommunip paasissutissat taakku ilanngunneqarnissaat qinnuigineq ajorpai. Uppernarsaanissamut piumasaqaatit qinnuteqariaatsinut taakkununga assigiittussaassagaluarput.

Kommunip uppernarsaatit pisariaqavissut kisiisa innuttaasumit tigujuassavai. Kommune innuttaasup isertitai pillugit paasissutissat Akileraartarnermut Aqutsisoqarfimmiit pisaramigit naatsorsuinernullu tunngavigisarlugit, suleriaatsit atuuttut aallaavigalugit innuttaasup aningaasarsiat allagartaat ukiumoortumillu naatsorsuutit tunniuttarnissai pisariaqavinngilaq. Taamaammat ingammik qarasaasiakkut qinnuteqartoqaraangat kommunip uppernarsaanissamut piumasaqaat piissagaluarpa, suliami pisariaqavinngimmat.

*Assakkut allallugit allannguutit*

Ineqarnermut meeqqanullu tapiissutit eqqarsaatigalugit nakkutilliisut assakkut allannguutit allanneqartarnerisa pillugit assigiinnik oqaaseqaatissaqarput. Qulequttap "Suliani isertitarineqartut qallerlugit assakkut allanneqaraangata kommune eqqumassaaq"-p ataani nakkutilliisut oqaaseqaataat takukkit. Assersuutigalugu taaneqarsinnaavoq suliami innuttaasup isertitai allannguuteqarnerisa kingorna allannguuteqaqqissimanersut pillugit kommunimit malitseqartinneqarsimanngilaq. Takussutissaqarporli innuttaasup isertitai piffissami sivisunerusumi allanngorsimasut, taamaakkaluortoq isertitassatut naatsorsuutigineqartut naleqqussarneqarsimanngillat.

**Inerniliineq**

Ataatsimut isigalugu kommune meeqqanut ineqarnermullu tapiissutit pillugit inatsisinut atuuttunut naapertuilluartumik ingerlatsivoq. Taamaakkaluortoq nakkutilliisut kommunip aaqqitassaanik arlalinnik nassaarsimapput. Aaqqitassat matumani atuarneqarsinnaapput.

Isumaginninnermi suliassaqaarfimmi nakkutilliisarneq pillugu Namminersorlutik Oqartussat nalunaarutaat nr. 1, 16. januaari 2020-imeersumi § 8 imm. 5 naapertorlugu manna atuuppoq: "Nakkutilliinermi inaarutaasumik nalunaarusiap kommunalbestyrelsimut nassiunneqarneraniit qaammatit marluk qaangiunnerini kommunalbestyrelse pissutsit nakkutilliinermi nalunaarusiami uparuaassutigineqartut iluarsiifiginiarlugit kommunalbestyrelse qanoq iliorniarnini pillugu Nakkutilliinermik Ingerlatsivimmit allakkatigut nalunaarusiortoqassaaq."